

Minister di Turismo Sr. Otmar Oduber

A firma Air Operating Certificate cu Insel Air

ORANJESTAD – Firmando e Air Operating Certificate (AOC) Minister Otmar Oduber a reconoce InselAir Aruba como e aerolinea mas nobo di Aruba.

Pa mas cu un aña y mei InselAir ta trahando pa realisa un compania nobo di aerolina na Aruba cu meta pa promove turismo pa Aruba door di bula destinacionnan nobo.

Un di e puntanan importante cu a wordo discuti durante di un reunion entre Minister Oduber y InselAir na 2011, ta con ta e miho manera pa stimula turismo pa Aruba. Den e reunion aki a keda palabra cu e aerolineanan Arubano nan meta ta, pa bula diferente destinacion pa asina saca e maximo for di e destinacionnan pa Aruba.

Resultado di e reunion aki ta cu InselAir a scohe pa algun ruta cual ainda no ta wordo opera door di otro aerolineanan Arubano. InselAir Aruba lo concentra riba ciudad nan manera Manao, Brazilia, Guayaquil, Medellin, Valencia y teniendo na cuenta cu durante e crecimiento di e aerolinea e cantidad di destinacionnan internacional lo yega sigur na un total di 15. E aerolinea aki tambe lo tin e funcion importante pa transporta pasaheronan di nan code share y interline partnernan Europeo, Caribense y Mericano caminda Aruba lo bai fungi como un hub internacional.

Minister Oduber a bisa di tin confiansa den e aerolina



Minister Otmar Oduber a bisa di tin confiansa den e aerolina nobo

nobo y cu InselAir Aruba lo duna un dimencion nobo na turismo di Aruba. Door di e tantisimo cooperacionnan cu e aerolinea tin cu diferente otro aerolineanan e crecimiento di turismo di Aruba ta algo segura y turistanan di destinacionnan nobo lo bishita Aruba. Esaki lo genera mas publicidad pa Aruba den region y mas leu.

Gerente General di Insel Air Sr. Edward Heerenveen a duna elogio na ekipo di Aruba bisando, “Lagami cuminsa cu bisa esaki, nos ta den aviacion pa hopi aña. Nos a experiencia hopi cos, nos a experiencia con nos a lanta Insel Air na Corsow pero e manera cu a lanta Insel Air Aruba, mester ta un ehempel pa hopi pais den Caribe y na mundo.”

Sr. Heerenveen a bisa cu hopi estudiante mester haci nan temporada di practica na Aruba pa por keda den un categoria 1, cu Aruba ta. E

Gerente a remarca cu Minister Oduber cu a caba di sali for di Washington caminda cu tabata tin puro elogio pa Minister, pa Aruba y pa nos servicio aereo. Y pa Insel Air bira miembro di e famia aki, Heerenveen a bisa cu no tin nada mas miho cu esey y cu pronto lo bini mas avion. “Rutanan cu nos a stipula hunto cu Minister y Tiar Air y Aruba Airlines, caminda cu nos no ta bringa cu otro, pero nos ta implementa den forma di cooperacion pa asina trece mas turista for di mas tanto destinacionnan posibel pa Aruba”, Heerenveen a bisa. □